

Seminari da kick-off: «Messadi en buttiglia»

■ (GiuRu) La YEN (Youth of European Nationalities) è la pli gronda rait pertutgant las organisaziuns giuvenilas da minoritads europeicas. Mintg'onn han lieu trais seminaris differents e quai mintgamai tar in'otra da quellas minoritads. Suenter il seminar a La Punt l'onn 2013 vegn il seminar da kick-off quest onn puspè organisà da la GiuRu ed ha lieu en il Grischun. Quai dals 11 fin ils 18 da favrer a Trin. Sper la collavuraziun cun la YEN vegn la GiuRu en l'organisaziun dal seminar sustegnida da la European Youth Foundation.

Il 2018 duess avrir in nov chapitel pertutgant la lavur da la giuventetgna da minoritads europeicas. Il seminar ha la finamira da rinforzar l'impurtanza da minoritads sin il nivel local e perquai è vegnida sviluppada l'idea dad in uschenumnà «minority messenger» – in «curier da minoritads». In minority messenger è ina persuna che dera il messadi da minoritads en lur regiun en l'Europa tar autras minoritads u tar la maioritad. En ils lavuratori dal seminar duain las participantas ed ils participants emprender las abilitads per gidar da metter enturn quella missiun. Pia

vegnan tractadas dumondas sco «Tge è emprender intercultural ed educaziun nunformala? Co pon ins optimar las abilitads da communicaziun, preschentaziun ed evaluaziun? Tge dovri per d'aver in minority messenger, co pon ins motivar e sustegnair auters u crear agens lavuratori?». Sch'i gartegia da sviluppar ina rait da minority messengers en l'entir'Europa fiss quai sco ina grond'embratschada. En il senn simbolic munta quest'abilitad in «messadi en buttiglia» ch'ils minority messengers pon prender cun sai sin lur missiuns e per pudair trenar participantas e participants en seminaris futurs.

Sper ils lavuratori èn planisadas excursiuns sco per exempel ina visita a Cui-ra u ina party da tschaiver per la quala tuttas e tuts pon purtar dulutschims or da lur pajais.

L'alloschi da las participantas e dals participants durant quel temp è l'albiert per la giuventetgna renovà a Trin, là han era lieu ils lavuratori differents. La GiuRu sa legra da beneventar bleras persunas interessadas durant quests dis e sin il barat enritgint! Per ulteriuras infurmaziuns pon ins gugent s'annunziar sut giuru@giuru.ch



La chasa Mesaglina entamez il vitg da Trin è la nova dimora dal center da guaud muntagnard – e per in'emna era la chasa d'albiert per minoritads europeicas.